

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02-538/09
Sarajevo, 12.05.2009. godine

Z A P I S N I K
**22. SJEDNICE DOMA NARODA PARLAMENTA FEDERACIJE BOSNE I
HERCEGOVINE, održane 28. aprila i 12. maja 2009. godine**

Sjednica je počela u 10.26.

Sjednici je predsjedavao Stjepan Krešić, predsjedavajući Doma naroda Parlamenta Federacije BiH.

Na početku sjednice predsjedavajući je pozdravio: delegate, potpredsjednika Federacije Bosne i Hercegovine Mirsada Kebu, premijera Vlade Federacije Bosne i Hercegovine Nedžada Brankovića, zamjenika premijera Gavrila Grahovca, zamjenika premijera Vjekoslava Bevandu, ministre u Vladi Federacije Bosne i Hercegovine, predstavnike udruženja, sindikata, međunarodnih organizacija, goste i predstavnike akreditiranih medijskih kuća koji prate rad sjednice.

Izostanak sa sjednice opravdali su Jasenko Tufekčić i Lidija Bradara.

Na osnovu evidencije Stručne službe, predsjedavajući je konstatovao da sjednici prisustvuje 49 delegata, što čini većinu, te Dom naroda može raditi i punovažno odlučivati.

Prije prelaska na rad delegati su, bez primjedbi i jednoglasno (52 glasa), usvojili Zapisnik 9. vanredne sjednice Doma naroda, održane 01. travnja 2009. godine, Zapisnik 20. sjednice Doma naroda Parlamenta Federacije Bosne i Hercegovine, održane 05. veljače 2009. godine i 19. ožujka 2009. godine, i Zapisnik 21. sjednice Doma naroda, održane 19. ožujka 2009. godine.

Nakon toga predsjedavajući je podsjetio delegate da na osnovu člana 104. Poslovnika o radu Doma naroda mogu postavljati delegatska pitanja, pokretati inicijative ili izraziti nezadovoljstvo dobijenim odgovorima.

Delegatska pitanja i inicijative

Josip Perić izrazio je nezadovoljstvo dobijenim odgovorom na pitanje koje se odnosi na Odluku kojom je premješten kantonalni porezni ured u Livnu u privatni objekt gdje se plaća zakupnina.

Također je izrazio nezadovoljstvo dobijenim odgovorom na pitanje u vezi sa Zakonom o inspekcijama i ponašanju pojedinih inspektora na terenu za vrijeme "akcije".

Muhamed Osmić izrazio je nezadovoljstvo odgovorom na pitanje vezano uz kupovinu zemljišta koje je Općina Maglaj kupila od Porezne uprave i koje u trenutku kupovine nije bilo opterećeno hipotekom, a to zemljište je od velikog značaja za općinu Maglaj.

Besim Imamović izrazio je nezadovoljstvo dobijenim odgovorom na dva pitanja.

Prvo je vezano uz nedostavljanje Zakona o šumama u roku od 60 dana u parlamentarnu proceduru.

Drugo se odnosi na odgovor dobiven od Federalnog ministarstva prometa i komunikacija i Direkcije cesta a radi se o izgradnji trotoara na potezu magistralne ceste Kladanj - Živinice.

Federalni ministar poljoprivrede, vodoprivrede i šumarstva Damir Ljubić dao je odgovor na prvo pitanje ističući da je prednacrt Zakona gotov i da će biti prosljeđen Vladi Federacije.

Edin Hozan izrazio je nezadovoljstvo dobijenim odgovorom koje se odnosi na tretman prilikom zapošljavanja povratnika u tri javna poduzeća u Jajcu.

Tomo Vidović izrazio je nezadovoljstvo konstatacijama u dobijenom odgovoru vezano uz problem naplate 152 KM od Instituta za medicinsko vještačenje zdravstvenog stanja prilikom ocjene zdravstvene sposobnosti. Također, istakao je da, prema njegovom mišljenju, Institut nezakonito postupi i očekuje da se pristupi rješavanju problema.

Mladen Lonić izrazio je nezadovoljstvo dobijenim odgovorom na pitanje u vezi sa asfaltiranjem magistralnog puta Bosanska Krupa - Bosanski Petrovac jer je u odgovoru navedeno da to nije jedini neasfaltirani put.

Nikola Simić izrazio je zadovoljstvo dobijenim odgovorom od Federalnog ministarstva zdravstva, ali je nezadovoljan nejasnim rokom za izmjenu Zakona o osnivanju Medicinskog instituta za vještačenje zdravstvenog stanja.

Drago Puzigaća izrazio je nezadovoljstvo dobijenim odgovorom od Federalnog ministarstva poljoprivrede, vodoprivrede i šumarstva. Tom prilikom postavio je tri pitanja.

Prvo pitanje odnosi se na odbacivanje kvalitetnih projekata, te je upitao da li će se ta praksa nastaviti. Projekti se odnose na vodosnabdijevanje općina Drvar, Glamoč i Bosansko Grahovo. Upitao je Federalno ministarstvo poljoprivrede, vodoprivrede i šumarstva da li je finansiranje poljoprivrednika na osnovu dodjele novčanih sredstava putem javnog konkursa nepotrebno poljoprivrednicima iz ovih općina.

Drugo pitanje upućeno je federalnom ministru finansija Vjekoslav Bevandi, na koji način će se vršiti kontrola mikro kreditnih banaka.

Sljedeće pitanje uputio je Federalnoj upravi za geodetske i imovinsko-pravne poslove vezano uz početak rada Komisije za izlaganje

podataka o nekretninama i utvrđivanje prava na nekretninama u Općini Bosanski Petrovac.

Na postavljena pitanja zatražio je odgovore u pisanoj formi.

Mislav Sučić kazao je da ni on nije dobio odgovor na pitanje da li je uvoz Gaude i negova cijena dampiška, a upućeno je resornim ministrima.

Zatražio je da mu Federalno ministarstvo poljoprivrede, vodoprivrede i šumarstva dostavi spisak fizičkih i pravnih lica koja su dobila rješenja za isplaćene poticaje za 2008. godinu a koja su prenesena u 2009. godinu. Ovo pitanje se odnosilo na područje Kantona 10.

Drugo pitanje upućeno je istom ministarstvu, ko je i kada dodijelio potrebne suglasnosti i koncesiju za korišćenje hidroakumulacije na Buškom jezeru. Upitao je kome Hrvatska elektroprivreda plaća naknadu za korišćenje koncesije. Na kraju je upitao što je vršna elektrana, te da li je cijena proizvodnje kW/h u ovim elektranama ista kao i u drugim elektranama.

Elvira Abdić-Jelenović uložila je požurnicu upućenu Vladi Federacije, a odnosi se na određene aktivnosti Vlade vezane uz privatizaciju „Agrokomerca”. Prvo pitanje odnosi se na dostavljanje spiska članova uprave „Agrokomerca” koji su odgovarali za zluoporabu ovlasti, otuđenje i krađu u preduzeću.

Drugo pitanje upućeno je Vladi Federacije i Federalnom ministarstvu pravde - na osnovu kojeg zakona se općinski i kantonalni sudovi proglašavaju nenadležnim u slučaju „Agrokomerc”.

Mira Ljubijankić pokrenula je inicijativu za davanje izvornog tumačenja čl. 62. i 64. Zakona o građevinskom zemljištu u Federaciji Bosne i Hercegovine.

Drugo pitanje odnosi se na stavljanje na dnevni red Prijedloga Zakona o osnovnim pravima lica sa onesposobljenjem.

Predsjedavajući Stjepan Krešić odgovorio je da će Kolegij Doma naroda održati sastanak sa Vladom Federacije u vezi sa Prijedlogom Zakona.

Saša Magazinović postavio je tri pitanja.

Prvo pitanje uputio je Federalnom ministarstvu prometa i komunikacija u vezi sa negodovanjem lokalnog stanovništva južnog dijela Mostara oko trase Koridora Vc i da li je tačno da su nanesene velike štete kulturnoj baštini u tom predjelu kao i vinogradarima.

Drugo pitanje upućeno je Vladi Federacije i Parlamentu Federacije, a traži da mu se dostavi spiska vozila koja čine vozni park Vlade i Parlamenta Federacije sa svim podacima vezanim uz godišta vozila, troškove i sl.

Tom prilikom postavio je pitanje - kada će se omogućiti svim konstitutivnim narodima jednak tretman pri zapošljavanju na području cijele Federacije Bosne i Hercegovine.

Dženana Zlatar postavila je pitanje Federalnom ministarstvu prometa i komunikacija - prema kojem pravnom osnovu je Vlada Federacije preuzela osnivačka prava nad Zavodom za promet pri Građevinskom fakultetu u Sarajevu i pretvorila ga u društvo sa ograničenom

odgovornošću, a Kanton Sarajevo kao osnivač Zavoda na to nikada nije dao suglasnost.

Bojan Bošnjak uputio je inicijativu prema Vladi Federacije, Federalnom ministarstvu poljoprivrede, vodoprivrede i šumarstva i Direkciji za robne rezerve sa zahtjevom da se stavi u funkciju institucija robnih rezervi do 01. srpnja 2009. godine u cilju rješavanja problema otkupa tržišnih viškova.

Kenan Keserović postavio je dva pitanja.

Prvo je upućeno Kolegiju Doma naroda i pita da li je Kolegij pripremio Nacrt Programa rada Doma naroda i kad će biti upućen u proceduru.

Drugo pitanje upućeno je Federalnom ministarstvu obrazovanja i nauke - da li se u propisanom roku izradio prednacrt Zakona o Fondu za nauku u Federaciji Bosne i Hercegovine i Zakon o studentskom organiziranju. Zatražio je da mu se u pisanom odgovoru prilože zakoni i nazivi organizacija i institucija koje su učestvovala u njihovoj izradi.

Besim Imamović postavio je tri pitanja.

Prvo pitanje upućeno je Vladi Federacije od koje traži odgovor kada će se formirati fond za zaštitu okoliša.

Drugo pitanje se odnosi na to da Vlada i nadležni organi utvrde minimalne propisane tehničke uvjete koje banke moraju ispunjavati po pojedinim područjima.

Treće pitanje upućeno je Federalnom pravobraniteljstvu i vezano je uz nezakonito dodjeljivanje šumskog zemljišta od Javnog preduzeća "Šume Tuzlanskog kantona". Ovo je ujedno i inicijativa upućena FMUP-u da pokrene adekvatne aktivnosti. Zamolio je ove dvije institucije da mu dostave izvještaje u vezi sa ovim pitanjem.

Miro Lazović pokrenuo je inicijativu za izmjenu Ustava Federacije Bosne i Hercegovine vezanu uz direktni izbor gradskih vlasti od građana.

Ivo Komšić zatražio je od Kolegija da organizira tematsku sjednicu o stanju privrede u Federaciji.

Igor Rajner uputio je pitanje Federalnom ministarstvu pravde - u kojoj je fazi formiranje savjeta nacionalnih manjina Federacije Bosne i Hercegovine.

Edin Hozan postavio je jedno pitanje i pokrenuo inicijativu. Postavio je pitanje vezano uz radove koji su u toku, a odnose se na sanaciju rijeke Plive i vodopada u Jajcu, istakavši da je problem što se u tako značajnom projektu zaobilazi Općina Jajce.

Nevenko Herceg, federalni ministar turizma i okoliša, izjavio je da se Projekt realizira od 2003. godine i da se redovno održavaju sastanci u Jajcu sa načelnikom općine i predsjedavajućim općinskog vijeća, a lokalna zajednica redovno izvještava.

Uputio je inicijativu prema Ustavnom sudu Federacije Bosne i Hercegovine da se što prije pred Ustavnim sudom razmotri Odluka o imenovanju općinskih pravobranitelja za općine Jajce i Dobretići.

Mira Jurić postavila je pitanje Vladi Federacije – koliko je ukupno uloženo sredstava u renoviranje zgrade Geodetskog zavoda i kada će objekt biti useljen.

Zoran Budimić pokrenuo je jednu inicijativu i postavio tri pitanja. Pokrenuo je inicijativu da Parlament Federacije organizira tematsku sjednicu o stanju privrede i poljoprivrede u Federaciji.

Prvo pitanje upućeno je federalnom ministru prometa i komunikacija, u vezi sa projektom autoceste Tuzla - Orašje.

Drugo pitanje odnosi se na investirana sredstva u Posavski kanton u periodu od 01.01.2004. godine do 31.12.2008. godine a u odnosu na ukupna ulaganja Federacije.

Treće pitanje upućeno je Kolegiju Doma naroda a odnosi se na neobavješćivanje Odbora za poljoprivredu, vodoprivredu i šumarstvo Doma naroda o posjetu delegacije Domu naroda ministarstva poljoprivrede Republike Italije, te zašto Odbor nije dobio informaciju o čemu se tom prilikom razgovaralo.

* * *

Budući da je Miro Lazović u okviru delegatskih pitanja pokrenuo inicijativu za izmjenu Ustava Federacije Bosne i Hercegovine, predsjedavajući je predložio da se o ovoj inicijativi obavi glasanje na nastavku sjednice sa čim se predlagač složio.

Nakon postavljenih pitanja i pokrenutih inicijativa prešlo se na utvrđivanje dnevnog reda.

Predsjedavajući je podsjetio delegate da je Vlada Federacije dostavila sljedeće prijedloge zakona sa prijedlogom da se razmatraju po hitnom postupku:

- Prijedlog Zakona o izmjenama i dopunama Zakona o utvrđivanju i načinu izmirenja unutrašnjih obaveza Federacije Bosne i Hercegovine,
- Prijedlog Zakona o izmjeni Zakona o budžetima u Federaciji Bosne i Hercegovine.

Na osnovu rezultata glasanja, predsjedavajući je konstatovao da je Dom naroda:

- sa 40 glasova za i uz dva uzdržana glasa, prihvatio da se Prijedlog Zakona o izmjenama i dopunama Zakona o utvrđivanju i načinu izmirenja unutrašnjih obaveza Federacije Bosne i Hercegovine razmatra po hitnom postupku;
- jednoglasno, sa 42 glasa, prihvatio da se Prijedlog Zakona o izmjeni Zakona o budžetima u Federaciji Bosne i Hercegovine razmatra po hitnom postupku.

Na osnovu rezultata glasanja, predsjedavajući je konstatovao da Dom naroda **nije prihvatio** da se Prijedlog Zakona o izmjenama i dopunama Zakona o štrajku, koji je predložila Vesna Saradžić, zastupnica u Predstavničkom domu, razmatra po skraćenom postupku jer je za glasalo

16 delegata a 20 delegata je bilo uzdržano. Prema tome, Zakon će se razmatrati u formi nacrtu Zakona.

Predsjedavajući je obavijestio delegate da je Predstavnički dom Prijedlog Zakona o dopuni Krivičnog zakona Federacije Bosne i Hercegovine, koji je predložila Vesna Saradžić, zastupnica u Predstavničkom domu, odlučio razmatrati u formi nacrtu Zakona. Kolegij Doma naroda je predložio da i Dom naroda Zakon razmatra u formi nacrtu, što su delegati prihvatili.

Kolegij Doma naroda je predložio a delegati su jednoglasno prihvatili da se u dnevni red ove sjednice uvrste sljedeće tačke: Odluka o davanju suglasnosti za prihvaćanje kredita Raiffeisen Zentralbank Ostterreich Aktiengesellschaft za Projekt "Razvoj sistema vodosnabdijevanja za općinu Livno", Odluka o davanju suglasnosti za zaključivanje Supsidijarnog kreditnog sporazuma između Bosne i Hercegovine i Federacije Bosne i Hercegovine za kredit Raiffeisen Zentralbank Ostterreich Aktiengesellschaft za Projekt "Razvoj sistema vodosnabdijevanja za općinu Livno", Sporazum o kreditu između Bosne i Hercegovine koju zastupa Ministarstvo finansija i trezora i Raiffeisen Zentralbank Ostterreich Aktiengesellschaft i Informacija o robnom kreditu Raiffeisen Zentralbank Ostterreich Aktiengesellschaft - Beč za Projekt "Razvoj sistema vodosnabdijevanja za općinu Livno".

Sa 36 glasova za, uz jedan glas protiv i uz deset uzdržanih glasova, prihvaćen je prijedlog Ive Komšića da se sa predloženog dnevnog reda skine 2. tačka - Prijedlog Zakona o jedinstvenom sistemu registracije, kontrole i naplate doprinosa.

Mislav Sučić izrazio je nezadovoljstvo što se odluke kojima se daju odobrenja na kredite međunarodnih organizacija stavljaju na kraju dnevnog reda.

Mira Ljubijankić zatražila je odgovor da li će Prijedlog Zakona o pravima lica sa onesposobljenjem biti na dnevnom redu ove sjednice.

Predsjedavajući Stjepan Krešić odgovorio je da će kolegiji domova Parlamenta Federacije održati sastanak sa Vladom Federacije u vezi sa ovim Zakonom.

Alija Begović je, ispred Kluba delegata bošnjačkog naroda, podržao Prijedlog Zakona.

Josip Perić je, ispred Kluba delegata hrvatskog naroda, predložio da sastanku prisustvuju predsjednica i potpredsjednici Federacije.

Nakon pauze, predsjedavajući Doma naroda obavijestio je delegate da je Kolegij predložio Zaključak koji je potom pročitao.

Na osnovu rezultata glasanja, predsjedavajući je konstatovao da je Dom naroda, većinom glasova i uz dva uzdržana glasa, usvojio sljedeći:

ZAKLJUČAK

Dom naroda Parlamenta Federacije Bosne i Hercegovine predlaže predsjednici Federacije i potpredsjednicima Federacije da hitno sazovu sastanak nosioca izvršne i zakonodavne vlasti, Kolegija Predstavničkog doma i Kolegija Doma naroda radi razmatranja:

- Informacije o pregovorima sa MMF-om i stand by aranžmanom,
- Analize u vezi sa donošenjem u Predstavničkom domu Prijedloga Zakona o osnovnim pravima lica sa onesposobljenjem (predlagači: Klub zastupnika SDA i Klub zastupnika SBiH u Predstavničkom domu) o čemu je potrebno da se izjasni Vlada Federacije i resorno ministarstvo kako bi se ponudilo rješenje,
- Razmatranje mjera za smanjenje javne potrošnje.

Potom se prešlo na glasanje o dnevnom redu.

Na osnovu rezultata glasanja, predsjedavajući je konstatovao da je Dom naroda jednoglasno (50 glasova) usvojio sljedeći:

DNEVNI RED

1. Prijedlog Zakona o poljoprivrednom zemljištu;
2. Prijedlog Zakona o izmjenama i dopunama Zakona o utvrđivanju i načinu izmirenja unutrašnjih obaveza Federacije Bosne i Hercegovine - hitni postupak;
3. Prijedlog Zakona o izmjeni Zakona o budžetima u Federaciji Bosne i Hercegovine - hitni postupak;
4. Prijedlog Zakona o profesionalnoj rehabilitaciji, osposobljavanju i zapošljavanju lica sa invaliditetom;
5. Nacrt Zakona o izmjenama i dopunama Zakona o štrajku (predlagač: Vesna Saradžić, zastupnica u Predstavničkom domu);
6. Prijedlog Zakona o izmjenama i dopunama Zakona o registraciji poslovnih subjekata u Federaciji Bosne i Hercegovine (predlagač: Klub zastupnika BPS - Sefer Halilović u Predstavničkom domu);
7. Nacrt Zakona o dopuni Krivičnog zakona Federacije Bosne i Hercegovine (predlagač: Vesna Saradžić, zastupnica u Predstavničkom domu);
8. Nacrt Zakona o unutrašnjoj trgovini;
9. Nacrt Zakona o zaštiti od nasilja u porodici;
10. Nacrt Zakona o izmjenama i dopunama Zakona o zaštiti zraka;
11. Nacrt Zakona o cestama u Federaciji Bosne i Hercegovine;
12. Nacrt Zakona o računovodstvu i reviziji u Federaciji Bosne i Hercegovine;
13. Nacrt Zakona o Finansijsko-informatičkoj agenciji;
14. Prijedlog Finansijskog plana FERK-a za 2009. godinu;
15. Prijedlozi odluka o davanju odobrenja na:

- a) Odluku o davanju suglasnosti za prihvaćanje kredita Međunarodne banke za obnovu i razvoj (IBRD) za Drugi projekt upravljanja čvrstim otpadom,
 - b) Odluku o davanju suglasnosti za zaključivanje Supsidijarnog ugovora između Bosne i Hercegovine i Federacije Bosne i Hercegovine za kredit Međunarodne banke za obnovu i razvoj (IBRD) za Drugi projekt upravljanja čvrstim otpadom,
 - c) Odluku o davanju suglasnosti za prihvaćanje kredita Međunarodne asocijacije za razvoj (IDA) za Drugi projekt upravljanja čvrstim otpadom,
 - d) Odluku o davanju suglasnosti za zaključivanje Supsidijarnog sporazuma između Bosne i Hercegovine i Federacije Bosne i Hercegovine za kredit Međunarodne asocijacije za razvoj (IDA) za Drugi projekt upravljanja čvrstim otpadom;
16. Prijedlozi odluka o davanju odobrenja na:
- a) Odluku o davanju suglasnosti za prihvaćanje kredita Raiffeisen Zentralbank Osterreich Aktiengesellschaft za Projekt "Razvoj sistema vodosnabdijevanja za općinu Livno",
 - b) Odluku o davanju suglasnosti za zaključivanje Supsidijarnog kreditnog sporazuma između Bosne i Hercegovine i Federacije Bosne i Hercegovine za kredit Raiffeisen Zentralbank Osterreich Aktiengesellschaft za Projekt "Razvoj sistema vodosnabdijevanja za općinu Livno",
 - c) Sporazum o kreditu između Bosne i Hercegovine koju zastupa Ministarstvo finansija i trezora i Raiffeisen Zentralbank Osterreich Aktiengesellschaft,
 - d) Informaciju o robnom kreditu Raiffeisen Zentralbank Osterreich Aktiengesellschaft-Beč za Projekt "Razvoj sistema vodosnabdijevanja za općinu Livno";
17. Obračun sredstava u zdravstvu u Federaciji Bosne i Hercegovine za 2007. godinu;
18. Izvještaj o radu Nadzornog odbora Federalnog zavoda za penziono i invalidsko osiguranje za period od 01.01.2007. do 31.12.2007. godine;
19. Informacija o implementaciji razvojnih projekata u Federaciji Bosne i Hercegovine u 2007. godini;
20. Informacija o reformi obrazovnog zakonodavstva sa Zaključkom Vlade Federacije Bosne i Hercegovine;
21. Izbor i imenovanja.

1. Prijedlog Zakona o poljoprivrednom zemljištu

Prijedlog Zakona utvrdila je Vlada Federacije.

Predstavnički dom je na nastavku 21. sjednice od 07.04.2009. godine usvojio Prijedlog Zakona sa šest amandmana koji se odnose na čl. 67., 35., 42., 69., 107. i 117., koje je Vlada Federacije prihvatila pa su postali sastavni dio Prijedloga Zakona.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložio je federalni ministar poljoprivrede, vodoprivrede i šumarstva Damir Ljubić.

Na Prijedlog Zakona amandmane su podnijeli: Zakonodavno-pravna komisija dva amandmana, Igor Rajner četiri amandmana i Ljubo Zovko jedan amandman.

Ispred Zakonodavno-pravne komisije govorio je Alija Begović, predsjednik Komisije, a ispred Odbora za poljoprivredu, vodoprivredu i šumarstvo predsjednik Odbora Zoran Budimić.

U raspravi su učestvovali: Mislav Sučić, Besim Spahić, Igor Rajner, Ljubo Zovko, Mladen Lonić, Zoran Budimić, Tomo Vidović, Nikola Simić, Edin Hozan, Radoje Vidović, Muhamed Osmić i Tomo Vidović. U raspravi je učestvovao i Damir Ljubić, federalni ministar poljoprivrede, vodoprivrede i šumarstva, koji je izjavio da prihvata amandmane Zakonodavno-pravne komisije, Amandman III Igora Rajnera i Amandman Ljube Zovke.

Amandmani glase:

Amandman I

U članu 43. u stavu 2. riječ "će" zamijenjuje se rječju "može".

Amandman II

U članu 43. stav 4. mijenja se i glasi:

"Odluku o davanju zemljišta u zakup donosi općinsko, odnosno gradsko vijeće protiv koje se može uložiti prigovor u roku od osam dana od dana dostavljanja. O prigovoru odlučuje općinsko, odnosno gradsko vijeće. Ugovor o zakupu sa zakupoprimcem potpisuje načelnik odnosno gradonačelnik."

Amandman III

U članu 69. u stavu 2. riječi iza zareza: "a koja im se ne može ograničiti" zamjenjuju se riječima: "u cilju njihove obrade i ako je prolaz nužan".

Amandman IV

U članu 69. stav 3. se briše.

Budući da je Igor Rajner odustao od neprihvaćenih amandmana, predsjedavajući je dao na glasanje Zaključak koji je predložila Zakonodavno-pravna komisija i, na osnovu rezultata glasanja, konstatovao da je Dom naroda jednoglasno usvojio sljedeći:

ZAKLJUČAK

Zadužuje se Federalno ministarstvo poljoprivrede, vodoprivrede i šumarstva da prilikom izrade podzakonskih akata i u provedbi Zakona o poljoprivrednom zemljištu posebnu pažnju obrati na slučajeve u kojima su vlasnici poljoprivrednog zemljišta izbjegla i raseljena lica – povratnici u duhu Aneksa VII. Općeg Okvirnog Sporazuma za mir u Bosni i Hercegovini.

Tom prilikom Dom naroda je jednoglasno (44 glasa) na prijedlog Odbora za poljoprivredu, vodoprivredu i šumarstvo usvojio i sljedeći:

ZAKLJUČAK

Zadužuje se Vlada Federacije Bosne i Hercegovine, odnosno Federalno ministarstvo poljoprivrede, vodoprivrede i šumarstva da do kraja 2009. godine izvrši analizu primjene Zakona o poljoprivrednom zemljištu u praksi i na osnovu saznanja do kojih dođe, kao i na osnovu primjedba, prijedloga i sugestija iznesenim na sjednici Doma naroda, pripremi izmjene i dopune Zakona i dostavi ih u parlamentarnu proceduru.

Potom se prešlo na glasanje o Prijedlogu Zakona.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno (45 glasova) usvojio Prijedlog Zakona o poljoprivrednom zemljištu.

Kako je Prijedlog Zakona o poljoprivrednom zemljištu usvojen u različitom tekstu u oba doma Parlamenta Federacije Bosne i Hercegovine **potrebno ga je usaglasiti.**

2. Prijedlog Zakona o izmjenama i dopunama Zakona o utvrđivanju i načinu izmirenja unutrašnjih obaveza Federacije Bosne i Hercegovine

Prijedlog Zakona utvrdila je Vlada Federacije.

Predstavnički dom je na 20. sjednici od 10.03.2009. godine usvojio Prijedlog Zakona sa amandmanom Vlade Federacije koji se odnosi na član 4. i koji je postao sastavni dio Prijedloga Zakona.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložili su Vjekoslav Bevanda, federalni ministar finansija, i Tihomir Ćurak, pomoćnik federalnog ministra finansija.

U raspravi su učestvovali: Muhamed Osmić, ministar Vjekoslav Bevanda i Tihomir Ćurak, pomoćnik federalnog ministra finansija.

Nakon rasprave Dom naroda je jednoglasno (40 glasova) usvojio sljedeći:

ZAKLJUČAK

1. Firma koja dobije vrijednosne papire na ime ratnog potraživanja, a ima neizmirene obaveze prema radnicima, odnosno za radnike prema PIO fondu i Fondu zdravstvenog osiguranja dužna je tim vrijednosnim papirima, odnosno njihovom eventualnom prodajom na tržištu izmiriti prvo te obaveze.
2. Zadužuje se Vlada Federacije Bosne i Hercegovine da izvuče i definira sve unutrašnje dugove i predloži način njihovog rješavanja.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno (40 glasova) usvojio Prijedlog Zakona o izmjenama i dopunama Zakona o utvrđivanju i načinu izmirenja unutrašnjih obaveza Federacije Bosne i Hercegovine.

3. Prijedlog Zakona o izmjeni Zakona o budžetima u Federaciji Bosne i Hercegovine

Prijedlog Zakona utvrdila je Vlada Federacije.

Predstavnički dom je na 20. sjednici od 10.03.2009. godine usvojio Prijedlog Zakona u tekstu kako ga je predložila Vlada Federacije.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložio je pomoćnik federalnog ministra finansija Pero Ivošević.

U raspravi su učestvovali Igor Rajner i pomoćnik federalnog ministra finansija Pero Ivošević.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 37 glasova za i uz jedan uzdržani glas, usvojio Prijedlog Zakona o izmjeni Zakona o budžetima u Federaciji Bosne i Hercegovine.

4. Prijedlog Zakona o profesionalnoj rehabilitaciji, osposobljavanju i zapošljavanju lica sa invaliditetom

Prijedlog Zakona utvrdila je Vlada Federacije.

Predstavnički dom je na 20. sjednici od 24.03.2009. godine usvojio Prijedlog Zakona sa sedam amandmana koji se odnose na čl. 5., 16., 36., 49., 50., 40. i 42. koji je Vlada Federacije prihvatila, pa su postali sastavni dio Prijedloga Zakona. Predstavnički dom je glasanjem usvojio i tri

amandmana koji se odnose na čl. 29., 50. i 51. koje Vlada Federacije nije prihvatila.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložio je Dobrica Jonjić, pomoćnik federalnog ministra rada i socijalne politike, koji je dao sljedeću **tehničku ispravku**, koju je Dom naroda jednoglasno (40 glasova) usvojio:

U članu 59. u stavu 1. al. 3. i 4. mjenjaju se i glase:

- "sredstava Federalnog zavoda za zapošljavanje u iznosu od 10 % sredstava planiranih finansijskim planom Federalnog zavoda za zapošljavanje za aktivnu politiku zapošljavanja u tekućoj godini;
- sredstva kantonalnih službi za zapošljavanje u iznosu od 5 % sredstava planiranih finansijskim planom kantonalnih službi za zapošljavanje za aktivnu politiku zapošljavanja u tekućoj godini."

U raspravi su učestvovali: Elvira Abdić Jelenović, pomoćnik federalnog ministra rada i socijalne politike Dobrica Jonjić i Josip Perić, predsjednik Kluba delegata hrvatskog naroda.

Potom se prešlo na glasanje o amandmanima koje je Predstavnički dom usvojio a Vlada Federacije nije prihvatila.

Amandman I koji se odnosi na član 29. nije dobio potrebnu većinu glasova jer su za glasala dva delegata.

Amandman II koji se odnosi na član 50. nije dobio potrebnu većinu glasova jer su za glasala dva delegata.

Amandman III koji se odnosi na član 51. nije dobio potrebnu većinu glasova jer su za glasala dva delegata.

Potom se prešlo na glasanje o Prijedlogu Zakona.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno (40 glasova) usvojio Prijedlog Zakona o profesionalnoj rehabilitaciji, osposobljavanju i zapošljavanju lica sa invaliditetom.

Prema tome Prijedlog Zakona o profesionalnoj rehabilitaciji, osposobljavanju i zapošljavanju lica sa invaliditetom usvojen je u različitom tekstu u oba doma Parlamenta Federacije Bosne i Hercegovine pa ga je **potrebno usuglasiti**.

5. Nacrt Zakona o izmjenama i dopunama Zakona o štrajku

Zakon je u formi prijedloga Zakona predložila Vesna Saradžić, zastupnica u Predstavničkom domu.

Predsjedavajući je podsjetio delegate da je Dom naroda u prethodnom postupku odlučio da Zakon razmatra u formi nacrta Zakona.

Predstavnički dom je na nastavku 18. sjednice od 13.01.2009. godine usvojio Zakon u formi prijedloga Zakona kako ga je predložila Vesna Saradžić.

Zakon su u formi prijedloga Zakona razmatrala nadležna radna tijela i dostavila svoja izvještaje.

Zakon je obrazložila Vesna Saradžić.

Ispred Vlade Federacije mišljenje o Zakonu dao je Drago Vrbić, savjetnik federalnog ministra rada i socijalne politike, koji je izjavio da Vlada Federacije ne podržava Zakon.

U raspravi su učestvovali Igor Rajner, Sead Čaušević i Vesna Saradžić.

Na osnovu rezultata glasanja, potpredsjedavajući Besim Imamović koji je tada predsjedavao sjednicom, konstatovao je da je Dom naroda, sa 33 glasa za i uz šest uzdržanih glasova, usvojio sljedeći:

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt Zakona o izmjenama i dopunama Zakona o štrajku i smatra da može poslužiti kao osnova za izradu prijedloga Zakona.
 2. Zadužuje se predlagač Zakona da Nacrt Zakona stavi na javnu raspravu koja će trajati 30 dana.
 3. Zadužuje se predlagač Zakona da prilikom izrade prijedloga Zakona uzme u obzir primjedbe, prijedloge i sugestije iznesene na sjednici Doma naroda kao i one iznesene na javnoj raspravi.
- 6. Prijedlog Zakona o izmjenama i dopunama Zakona o registraciji poslovnih subjekata u Federaciji Bosne i Hercegovine**

Predlagač Zakona je Klub zastupnika BPS - Sefer Halilović u Predstavničkom domu.

Predstavnički dom je na nastavku 17. sjednice od 29.10.2008. godine usvojio Prijedlog Zakona sa amandmanom predlagača koji se odnosi na član 48. pa je postao sastavni dio Prijedloga Zakona.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložio je Ibro Omerbašić, predstavnik Kluba zastupnika BPS - Sefer Halilović u Predstavničkom domu.

U raspravi je učestvovao Tomo Vidović, koji je predložio da se u vidu **tehničke ispravke** u čl. od 1. do 6. riječi: „notarski određen“ zamjene riječima: „notarski obrađen“ u određenim padežima kako to stoji od člana 7. pa do kraja teksta Zakona, što je predlagač prihvatio.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 37 glasova za i uz jedan uzdržani glas, usvojio Prijedlog Zakona o izmjenama i dopunama Zakona o registraciji poslovnih subjekata u Federaciji Bosne i Hercegovine.

7. Nacrt Zakona o dopuni Krivičnog zakona Federacije Bosne i Hercegovine

Zakon je u formi prijedloga Zakona predložila Vesna Saradžić, zastupnica u Predstavničkom domu.

Predsjedavajući je podsjetio delegate da je Dom naroda u prethodnom postupku odlučio da Zakon razmatra u formi nacrta Zakona.

Predstavnički dom je na nastavku 21. sjednice od 07.04.2009. godine razmatrao Zakon u formi nacrta i Zaključkom ga prihvatio.

Zakon su u formi prijedloga Zakona razmatrala nadležna radna tijela i dostavila svoje izvještaje.

Zakon je obrazložila Vesna Saradžić.

U raspravi su učestvovali: Dženana Zlatar, Saša Magazinović, Mira Ljubijankić, Miro Lazović, Josip Perić, Ramo Isak, Besim Imamović, Ivo Komšić, Alija Begović, Igor Rajner, Besim Spahići, Sead Čaušević, Asim Kamber, Fahrudin Skopljak, Feliks Vidović, federalni ministar pravde, i Vesna Saradžić.

Na osnovu rezultata glasanja, predsjedavajući Stjepan Krešić, koji je tada predsjedavao sjednicom, konstatovao je da Dom naroda **nije prihvatio** Nacrt Zakona o dopuni Krivičnog zakona Federacije Bosne i Hercegovine jer je za glasalo 14 delegata, šest delegata je bilo protiv a 30 delegata je bilo uzdržano.

Potom je predsjedavajući prekinuo sjednicu u 16.37.

* * *

NASTAVAK SJEDNICE OD 12. MAJA 2009. GODINE

Sjednica je počela u 10.31.

Sjednici je predsjedavao Stjepan Krešić, predsjedavajući Doma naroda Parlamenta Federacije Bosne i Hercegovine.

Na početku sjednice predsjedavajući je pozdravio: delegate, premijera Vlade Federacije Bosne i Hercegovine Nedžada Brankovića, ministre u Vladi Federacije, predstavnike udruženja, sindikata, međunarodnih organizacija, goste i predstavnike akreditiranih medijskih kuća koji prate rad sjednice.

Izostanak sa sjednice opravdali su: Jasenko Tufekčić, Ivo Komšić, Besim Spahić i Svetozar Pudarić.

Na osnovu evidencije Stručne službe, predsjedavajući je konstatovao da sjednici prisustvuju 42 delegata, što čini većinu, te da Dom naroda može raditi i punovažno odlučivati.

Prije prelaska na rad predsjedavajući je podsjetio delegate na preostale tačke dnevnoga reda i prešao na rad.

Također je podsjetio delegate da je Dom naroda u obavezi da se izjasni o Inicijativi za izmjenu Ustava Federacije Bosne i Hercegovine u vezi sa izborom gradonačelnika i gradskog vijeća koju je pokrenuo Miro Lazović pa ga je pozvao da je pročita.

INICIJATIVA ZA PROMJENU USTAVA FEDERACIJE BOSNE I HERCEGOVINE

U odjeljku VII. Ustava Federacije Bosne i Hercegovine u kojem se govori o gradskoj vlasti potrebno je predvidjeti da se izbor gradskog vijeća kao i gradonačelnika vrši neposrednim tajnim izborom od građana. Stoga u članu 4. – Gradske vlasti – treba brisati stav b), a u odjeljku VIII. – Organizacija Sarajeva, precizirati izbornu jedinicu na kojoj bi građani Sarajeva neposredno i tajno birali Gradsko vijeće i gradonačelnika Grada Sarajeva.

Također, u odjeljku IX. – Organizacija Mostara - u članu 1. u stavu 7. brisati rečenicu: „Gradonačelnika bira i smjenjuje 2/3 većina izabranih vijećnika.“

U raspravi u vezi sa Inicijativom učestvovali su: Omer Čevra, Miro Lazović i Alija Begović, predsjednik Kluba delegata bošnjačkog naroda.

Nakon rasprave Dom naroda je, sa 37 glasova za i uz jedan uzdržani glas, usvojio Inicijativu i prihvatio prijedlog delegata Omera Čevre koji je podržao i Klub delegata bošnjačkog naroda da se Inicijativa proširi. Zadužena je Komisija za ustavna pitanja Doma naroda da izanalizira Inicijativu i njenu usklađenost sa Evropskom poveljom za lokalnu samoupravu, odnosno definicijom lokalne samouprave prema Povelji i o tome obavijesti Dom naroda.

8. Nacrt Zakona o unutrašnjoj trgovini

Nacrt Zakona utvrdila je Vlada Federacije.

Predstavnički dom je na nastavku 21. sjednice od 07.04.2009. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila svoje izvještaje.

Nacrt Zakona obrazložio je Desnica Radivojević, federalni ministar trgovine.

U raspravi su učestvovali: Muhamed Osmić, Slobodan Tomić, Besim Imamović, Sead Čaušević, Lidija Bradara, Nikola Simić i Desnica Radivojević, federalni ministar trgovine.

Na osnovu rezultata glasanja, predsjedavajući je konstatovao da je Dom naroda, sa 30 glasova za i uz šest uzdržanih glasova, usvojio sljedeći:

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt Zakona o unutrašnjoj trgovini i smatra da može poslužiti kao osnova za izradu prijedloga Zakona.
2. Zadužuje se Vlada Federacije da prilikom izrade prijedloga Zakona ima u vidu prijedloge, primjedbe i sugestije iznesene na sjednici.

9. Nacrt Zakona o zaštiti od nasilja u porodici

Nacrt Zakona utvrdila je Vlada Federacije.

Predstavnički dom je na nastavku 20. sjednice od 24.03.2009. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila svoje izvještaje.

Nacrt zakona obrazložio je Feliks Vidović, federalni ministar pravde.

U raspravi su učestvovali: Snježana Milavić, Kenan Keserović, Mira Ljubijankić, Lidija Bradara, Dženana Zlatar, Muharem Serbezovski i Zoran Budimić.

Na osnovu rezultata glasanja, predsjedavajući je konstatovao da je Dom naroda jednoglasno (38 glasova), usvojio sljedeći:

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt Zakona o zaštiti od nasilja u porodici i smatra da može poslužiti kao osnova za izradu prijedloga Zakona.
2. Zadužuje se Vlada Federacije da prilikom izrade prijedloga Zakona ima u vidu prijedloge, primjedbe i sugestije iznesene na sjednici.

10. Nacrt Zakona o izmjenama i dopunama Zakona o zaštiti zraka

Nacrt Zakona utvrdila je Vlada Federacije.

Predstavnički dom je na nastavku 20. sjednice od 24.03.2009. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila svoje izvještaje.

Nacrt Zakona obrazložio je Nevenko Herceg, federalni ministar turizma i okoliša.

Ispred Odbora za prostorno uređenje, ekologiju i stambeno-komunalne poslove izvještaj je obrazložila Elvira Abdić Jelenović, predsjednica Odbora.

U raspravi je učestvovala Elvira Abdić Jelenović.

Na osnovu rezultata glasanja, predsjedavajući je konstatovao da je Dom naroda jednoglasno (40 glasova) usvojio sljedeći:

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt Zakona o izmjenama i dopunama Zakona o zaštiti zraka i smatra da može poslužiti kao osnova za izradu prijedloga Zakona.
2. Zadužuje se Vlada Federacije da prilikom izrade prijedloga Zakona ima u vidu prijedloge, primjedbe i sugestije iznesene na sjednici.

11. Nacrt Zakona o cestama u Federaciji Bosne i Hercegovine

Nacrt Zakona utvrdila je Vlada Federacije.

Predstavnički dom je na nastavku 20. sjednice od 11.03.2009. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila svoje izvještaje.

Nacrt Zakona obrazložio je Nail Šećkanović, federalni ministar prometa i komunikacija.

U raspravi su učestvovali: Elvira Abdić Jelenović, Mika Lešić, Josip Perić, Lidija Bradara, Slobodan Tomić, Igor Rajner, Mira Ljubijankić i Tomo Vidović.

Na osnovu rezultata glasanja, predsjedavajući je konstatovao da je Dom naroda jednoglasno (40 glasova) usvojio sljedeći:

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt Zakona o cestama u Federaciji Bosne i Hercegovine i smatra da može poslužiti kao osnova za izradu prijedloga Zakona.
2. Zadužuje se Vlada Federacije da prilikom izrade prijedloga Zakona ima u vidu prijedloge, primjedbe i sugestije iznesene na sjednici.

12. Nacrt Zakona o računovodstvu i reviziji u Federaciji Bosne i Hercegovine

Nacrt Zakona utvrdila je Vlada Federacije.

Predstavnički dom je na nastavku 19. sjednice od 28.01.2009. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila svoje izvještaje.

Nacrt zakona obrazložila je Mira Bradara, pomoćnica federalnog ministra finansija.

U raspravi su učestvovali Igor Rajner i Elvira Abdić Jelenović.

Na osnovu rezultata glasanja, predsjedavajući je konstatovao da je Dom naroda jednoglasno (40 glasova) usvojio sljedeći:

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt Zakona o računovodstvu i reviziji u Federaciji Bosne i Hercegovine i smatra da može poslužiti kao osnov za izradu prijedloga Zakona.
2. Zadužuje se Vlada Federacije da prilikom izrade prijedloga Zakona ima u vidu prijedloge, primjedbe i sugestije iznesene na sjednici.

13. Nacrt Zakona o Finansijsko-informatičkoj agenciji

Nacrt Zakona utvrdila je Vlada Federacije.

Predstavnički dom je na nastavku 19. sjednice od 28.01.2009. godine razmatrao Nacrt Zakona i Zaključkom ga prihvatio.

Nacrt Zakona razmatrala su nadležna radna tijela i dostavila svoje izvještaje.

Nacrt Zakona obrazložila je Mira Bradara, pomoćnica federalnog ministra finansija.

U raspravi su učestvovali Mislav Sučić i Igor Rajner.

Na osnovu rezultata glasanja, predsjedavajući je konstatovao da je Dom naroda, sa 38 glasova za i uz dva uzdržana glasa, usvojio sljedeći:

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt Zakona o Finansijsko-informatičkoj agenciji i smatra da može poslužiti kao osnov za izradu prijedloga Zakona.
2. Zadužuje se Vlada Federacije da prilikom izrade prijedloga Zakona ima u vidu prijedloge, primjedbe i sugestije iznesene na sjednici.

14. Prijedlog Finansijskog plana FERK-a za 2009. godinu

Regulatorna komisija za električnu energiju u Federaciji Bosne i Hercegovine dostavila je Parlamentu Federacije Prijedlog Finansijskog plana FERK-a za 2009. godinu radi razmatranja i usvajanja.

Predstavnički dom je na nastavku 21. sjednice od 07.04.2009. godine usvojio Prijedlog Finansijskog plana FERK-a za 2009. godinu.

Plan su razmatrala nadležna radna tijela i dostavila svoje izvještaje.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda jednoglasno (40 glasova) usvojio Prijedlog Finansijskog plana FERK-a za 2009. godinu.

15. Prijedlozi odluka o davanju odobrenja na:

- a) Odluku o davanju suglasnosti za prihvaćanje kredita Međunarodne banke za obnovu i razvoj (IBRD) za Drugi projekt upravljanja čvrstim otpadom**
- b) Odluku o davanju suglasnosti za zaključivanje Supsidijarnog ugovora između Bosne i Hercegovine i Federacije Bosne i Hercegovine za kredit Međunarodne banke za obnovu i razvoj (IBRD) za Drugi projekt upravljanja čvrstim otpadom**
- c) Odluku o davanju suglasnosti za prihvaćanje kredita Međunarodne asocijacije za razvoj (IDA) za Drugi projekt upravljanja čvrstim otpadom**
- d) Odluku o davanju suglasnosti za zaključivanje Supsidijarnog sporazuma između Bosne i Hercegovine i Federacije Bosne i Hercegovine za kredit Međunarodne asocijacije za razvoj (IDA) za Drugi projekt upravljanja čvrstim otpadom**

Odluke je donijela Vlada Federacije i dostavila ih Parlamentu radi razmatranja i odobravanja.

Predstavnički dom je na nastavku 19. sjednice od 28.01.2009. godine odobrio ove odluke.

Odluke su razmatrala nadležna radna tijela i dostavila svoje izvještaje.

Predsjedavajući je predložio da se o odlukama vodi zajednička rasprava, a izjašnjavanje obavi pojedinačno, što su delegati prihvatili.

Kako u raspravi nije niko učestvovao predsjedavajući je stavio odluke na glasovanje.

- a) Odluka o davanju suglasnosti za prihvaćanje kredita Međunarodne banke za obnovu i razvoj (IBRD) za Drugi projekt upravljanja čvrstim otpadom**

Na osnovu rezultata glasanja, predsjedavajući je konstatovao da je Dom naroda jednoglasno (40 glasova) donio Odluku kojom je **odobrio** Odluku o davanju suglasnosti za prihvaćanje kredita Međunarodne banke za obnovu i razvoj (IBRD) za Drugi projekt upravljanja čvrstim otpadom.

b) Odluku o davanju suglasnosti za zaključivanje Supsidijarnog ugovora između Bosne i Hercegovine i Federacije Bosne i Hercegovine za kredit Međunarodne banke za obnovu i razvoj (IBRD) za Drugi projekt upravljanja čvrstim otpadom

Na osnovu rezultata glasanja, predsjedavajući je konstatovao da je Dom naroda jednoglasno (40 glasova) donio Odluku kojom je **odobrio** Odluku o davanju suglasnosti za zaključivanje Supsidijarnog ugovora između Bosne i Hercegovine i Federacije Bosne i Hercegovine za kredit Međunarodne banke za obnovu i razvoj (IBRD) za Drugi projekt upravljanja čvrstim otpadom.

c) Odluku o davanju suglasnosti za prihvaćanje kredita Međunarodne asocijacije za razvoj (IDA) za Drugi projekt upravljanja čvrstim otpadom

Na osnovu rezultata glasanja, predsjedavajući je konstatovao da je Dom naroda jednoglasno (40 glasova) donio Odluku kojom je **odobrio** Odluku o davanju suglasnosti za prihvaćanje kredita Međunarodne asocijacije za razvoj (IDA) za Drugi projekt upravljanja čvrstim otpadom.

d) Odluku o davanju suglasnosti za zaključivanje Supsidijarnog sporazuma između Bosne i Hercegovine i Federacije Bosne i Hercegovine za kredit Međunarodne asocijacije za razvoj (IDA) za Drugi projekt upravljanja čvrstim otpadom

Na osnovu rezultata glasanja, predsjedavajući je konstatovao da je Dom naroda jednoglasno (40 glasova) donio Odluku kojom je **odobrio** Odluku o davanju suglasnosti za zaključivanje Supsidijarnog sporazuma između Bosne i Hercegovine i Federacije Bosne i Hercegovine za kredit Međunarodne asocijacije za razvoj (IDA) za Drugi projekt upravljanja čvrstim otpadom.

16. **Prijedlozi odluka o davanju odobrenja na:**
- a) **Odluku o davanju suglasnosti za prihvaćanje kredita Raiffeisen Zentralbank Osterreich Aktiengesellschaft za Projekt "Razvoj sistema vodosnabdijevanja za općinu Livno"**
 - b) **Odluku o davanju suglasnosti za zaključivanje Supsidijarnog kreditnog sporazuma između Bosne i Hercegovine i Federacije Bosne i Hercegovine za kredit Raiffeisen Zentralbank Osterreich Aktiengesellschaft za Projekt "Razvoj sistema vodosnabdijevanja za općinu Livno"**
 - c) **Sporazum o kreditu između Bosne i Hercegovine koju zastupa Ministarstvo finansija i trezora i Raiffeisen Zentralbank Osterreich Aktiengesellschaft**
 - d) **Informacija o robnom kreditu Raiffeisen Zentralbank Osterreich Aktiengesellschaft - Beč za Projekt "Razvoj sistema vodosnabdijevanja za općinu Livno"**

Odluke je donijela Vlada Federacije i dostavila ih Parlamentu radi razmatranja i odobravanja.

Predstavnički dom je na nastavku 21. sjednice od 22.04.2009. godine odobrio ove odluke.

Odluke su razmatrala nadležna radna tijela i dostavila svoje izvještaje.

Predsjedavajući je predložio da se o odlukama vodi zajednička rasprava, a izjašnjavanje obavi pojedinačno, što su delegati prihvatili.

Kako u raspravi nije niko učestvovao predsjedavajući je stavio odluke na glasanje.

a) Odluka o davanju suglasnosti za prihvaćanje kredita Raiffeisen Zentralbank Osterreich Aktiengesellschaft za Projekt "Razvoj sistema vodosnabdijevanja za općinu Livno"

Na osnovu rezultata glasanja, predsjedavajući je konstatovao da je Dom naroda jednoglasno (40 glasova) donio Odluku kojom je **odobrio** Odluku o davanju suglasnosti za prihvaćanje kredita Raiffeisen Zentralbank Osterreich Aktiengesellschaft za Projekt "Razvoj sistema vodosnabdijevanja za općinu Livno".

b) Odluka o davanju suglasnosti za zaključivanje Supsidijarnog kreditnog sporazuma između Bosne i Hercegovine i Federacije Bosne i Hercegovine za kredit Raiffeisen Zentralbank Osterreich Aktiengesellschaft za Projekat "Razvoj sistema vodosnabdijevanja za općinu Livno"

Na osnovu rezultata glasanja, predsjedavajući je konstatovao da je Dom naroda jednoglasno (40 glasova) donio Odluku kojom je **odobrio** Odluku o davanju suglasnosti za zaključivanje Supsidijarnog kreditnog sporazuma između Bosne i Hercegovine i Federacije Bosne i Hercegovine za kredit Raiffeisen Zentralbank Osterreich Aktiengesellschaft za Projekat "Razvoj sistema vodosnabdijevanja za općinu Livno".

c) Sporazum o kreditu između Bosne i Hercegovine koju zastupa Ministarstvo finansija i trezora i Raiffeisen Zentralbank Osterreich Aktiengesellschaft

Na osnovu rezultata glasanja, predsjedavajući je konstatovao da je Dom naroda jednoglasno (40 glasova) **primio na znanje** Sporazum o kreditu između Bosne i Hercegovine koju zastupa Ministarstvo finansija i trezora i Raiffeisen Zentralbank Osterreich Aktiengesellschaft.

d) Informacija o robnom kreditu Raiffeisen Zentralbank Osterreich Aktiengesellschaft - Beč za Projekt "Razvoj sistema vodosnabdijevanja za općinu Livno"

Na osnovu rezultata glasanja, predsjedavajući je konstatovao da je Dom naroda jednoglasno (40 glasova) **primio na znanje** Informaciju o robnom kreditu Raiffeisen Zentralbank Osterreich Aktiengesellschaft - Beč za Projekt "Razvoj sistema vodosnabdijevanja za općinu Livno".

17. Obračun sredstava u zdravstvu u Federaciji Bosne i Hercegovine za 2007. godinu

Obračun sredstava u zdravstvu u Federaciji Bosne i Hercegovine za 2007. godinu razmotrila je Vlada Federacije i Odlukom ga prihvatila, te dostavila Parlamentu Federacije radi razmatranja i usvajanja.

Predstavnički dom je na nastavku 17. sjednice od 18.11.2008. godine prihvatio Obračun sredstava u zdravstvu u Federaciji Bosne i Hercegovine za 2007. godinu.

Obračun sredstava razmatrala su nadležna radna tijela i dostavila svoje izvještaje.

U raspravi je učestvovao Tomo Vidović.

Na osnovu rezultata glasanja, predsjedavajući je konstatovao da je Dom naroda, sa 38 glasova i uz dva uzdržana glasa, usvojio Obračun sredstava u zdravstvu u Federaciji Bosne i Hercegovine za 2007. godinu.

18. Izvještaj o radu Nadzornog odbora Federalnog zavoda za penziono i invalidsko osiguranje za period od 01.01.2007. do 31.12.2007. godine

Na osnovu člana 9. Zakona o organizaciji penzionog i invalidskog osiguranja Nadzorni odbor podnio je Izvještaj o svom radu Parlamentu Federacije radi razmatranja i usvajanja.

Predstavnički dom je na nastavku 16. sjednice od 28.10.2008. godine prihvatio Izvještaj sa Izvještajem o finansijskom poslovanju Federalnog zavoda za penziono i invalidsko osiguranje za 2007. godinu.

Izvještaj su razmatrala nadležna radna tijela i dostavila svoje izvještaje.

U raspravi su učestvovali Igor Rajner i Lidija Bradara.

Na osnovu rezultata glasanja, predsjedavajući je konstatovao da Dom naroda **nije prihvatio** Izvještaj o radu Nadzornog odbora Federalnog zavoda za penziono i invalidsko osiguranje za period od 01.01.2007. do 31.12.2007. godine jer je za glasalo 26 delegata, tri su bila protiv i 11 uzdržanih.

19. Informacija o implementaciji razvojnih projekata u Federaciji Bosne i Hercegovine u 2007. godini

Informaciju je utvrdila Vlada Federacije i dostavila je Parlamentu Federacije radi razmatranja.

Predstavnički dom je na nastavku 18. sjednice od 27.01.2009. godine razmatrao Informaciju o implementaciji razvojnih projekata u Federaciji Bosne i Hercegovine u 2007. godini i tom prilikom usvojio Zaključak kojim je obavezao Vladu Federacije da u roku od 60 dana Predstavničkom domu dostavi Informaciju o implementaciji razvojnih projekata u Federaciji Bosne i Hercegovine u 2008. godini.

Informaciju su razmatrala nadležna radna tijela i dostavila svoje izvještaje.

Informaciju je obrazložio Samir Bakić, v.d. pomoćnika federalnog ministra finansija.

U raspravi su učestvovali Mislav Sučić, Samir Bakić, v.d. pomoćnika federalnog ministra finansija i Igor Rajner.

Na osnovu rezultata glasanja, predsjedavajući je konstatovao da je Dom naroda, sa 32 glasa za i uz osam uzdržanih glasova, primio na znanje Informaciju o implementaciji razvojnih projekata u Federaciji Bosne i Hercegovine u 2007. godini.

20. Informacija o reformi obrazovnog zakonodavstva sa Zaključkom Vlade Federacije Bosne i Hercegovine

Informaciju je utvrdila Vlada Federacije i dostavila Parlamentu Federacije radi razmatranja i usvajanja.

Predstavnički dom je na nastavku 19. sjednice od 28.01.2009. godine razmatrao Informaciju o reformi obrazovnog zakonodavstva sa Zaključkom Vlade Federacije Bosne i Hercegovine i primio je na znanje.

Informaciju su razmatrala nadležna radna tijela i dostavila svoje izvještaje.

Informaciju je obrazložio Zenan Šabanac, savjetnik federalne ministrice obrazovanja i nauke.

U raspravi su učestvovali: Mira Ljubijankić, Tomo Vidović, Dženana Zlataar i Kenan Keserović.

Na osnovu rezultata poimeničnog glasanja koje je obavio sekretar Doma naroda Izmir Hadžić, predsjedavajući je konstatovao da Dom naroda **nije usvojio** Informaciju o reformi obrazovnog zakonodavstva sa Zaključkom Vlade Federacije Bosne i Hercegovine jer je za glasalo 25 delegata a 15 ih je bilo uzdržano.

21. Izbor i imenovanja

U okviru ove tačke dnevnog reda nije bilo materijala za razmatranje.

* * *

Sjednica je završena u 15.40.

* * *

Transkript sjednice čini sastavni dio Zapisnika.

SEKRETAR

Izmir Hadžić

PREDSJEDAVAJUĆI

Stjepan Krešić